



Jumat, 08 Desember 2024
Ogen: Maleaki 4:4-6



Bapa Ras Anaka Ipersada



Sepuluh Hukum Taurat enggo ibereken Tuhan man Musa i Deleng Sinai. Isina, Undang-undang ras perintah Tuhan si man ikutenken bangsa Israel. Sepuluh pedah e jadi orat nggeluh si man ikutenken bangsa e. Undang-undang e min enggo jadi sada bagin i bas kegeluhenna, leket i bas pusuhna (mendarah daging). Si e teridah arah lagu langkahna si teptep wari. Terdauhen, undang-undang e jadi identitasna, e si erbahansa ia la seri ras bangsa si deban si la nandai Tuhan. Siniarapken Tuhan, tetap min bangsa Israel e ndalanken undang-undang e suari ras berngi. Labo terjeng sanga ia nggeluh ras Musa saja. Undang-undang e idalanken seh ku wari Tuhan ipetangkasNa i bas doni enda.

Teridah maka Tuhan mereken waktu/kesempatan man bangsa Israel gelah ndalanken undang-undang e si teridah arah nehken kekelengen. Umpamana, erdame, bapa ras anak ipersada mulihi. Ertina, I bas kegeluhen bangsa Israel sedekah enda enggo lanai ersada bapa ras anak, turah perjengilen ras perubaten, lanai lit kehamaten anak man bapa entah kekelengen bapa enggo urak man anak-anakna. Tapi sekali enda tadingkenlah si jahat e, mulihilah erdame, ras sikelengkelengen. Guna si e isuruh Tuhan pagi nabi Elia mpersadasa. Bagi si eteh turi-turin nabi Elia, si munuh kerina nabi-nabi Baal, ituduhkan Elia Kuasa Dibata man Israel. Tujunna gelah mulihken bangsa e nembah Dibata si nggeluh. Ndauh kal ganjangan ras gegehen Dibata e asangken Baal si isembahan kalak Israel paksa e. Sura-suraNa mulihlah bangsa Israel ku Dibata, erdame ras Ia. Bagepe teridah perdamen bapa saphisaphi bangsa Israel. Bapa ras anak ersada mulihi.